

晚晴移詩匯

晚晴彞詩匯卷五十四目錄

張坦 十九首

張壘 五首

常安 四首

張瓚 二首

段標麟 一首

陳養元 二首

廖鳳徵 三首

梅以燕 一首

曹源郁 一首

朱軾 一首

高其倬 十八首

法海 一首

呂履恆 二十首

周起渭 十六首

滿保 二首

陳璜 四首

屠沂 一首

陳豫朋 四首

陳霆萬 一首

米調元 一首

林豫吉 三首

周鍾瑄 二首

許遂 一首

李鍾璧 一首

石芳 二首

謝方琦 四首

李永祺 二首

何梅 二首

丁佩玉 一首

嚴虞惇 三首

姜宸英 三首

汪士鋐 一首

蔡珽 十二首

李鳳翥 二首

張元臣 一首

宋聚業 一首

吳宗豐 一首

王樵 二首

晚晴移詩匯卷五十四

徐世昌

張坦字逸峯號青雨撫甯人康熙癸酉舉人官內閣中

書有履閣詩集

姜西溟曰登泰山古詩及諸五言近體飄渺倚宕氣格渾成求之唐詩家天分絕類李白陶鳧菊日逸峯昆季承其父魯莽叔笨山之學問與同時諸名士游故所作皆清逸妥帖彬彬乎質有其文詩話國初畿輔詩人最盛如申鳧盟張覆與殷伯巖趙秋水劉津逮楊猶龍龐雪崖諸家多出畿南而北部較少逸峯父魯莽方伯罷官後僑居天津構問津園名流鵬詠所集竹垞西溟初白秋谷皆曾主其家魯莽弟笨山詩亦有才氣逸峯與弟聲百同舉於鄉同官薇省詩學並有淵源而逸峯所造較深斐然作者灑淪間可稱獨秀

古意

孟嘗廣致客鳴吠亦不辭士爲知己用何者不可爲遂謂

雞狗輩生平盡於斯尺蠖與蚪龍屈伸在一時丈夫以身許逃義奚所之所以魯仲連高蹈東海湄

我登黃金臺郭隗今何往禮士在推心千金等土壤士也爲利趨襟懷亦可想蹙者奪所愛高風羣欽仰臺以黃金名宜乎委草莽

昨日逢寒士酒煥肝膽揭今日游朱門更見五情熱纖素與織縑新舊各異轍共羨桃李花誰看松柏雪鬱鬱抱孤懷炎涼渾無別甯爲世所嫌毋爲世所悅

楚漢征戰處英雄時已備龍準與重瞳駕馭無絆驥狂哉阮嗣宗睥睨豎子視身當割據時昏酣遺世事清談生春風坐看中原墜廢事猶可爲誤事難引繩千古褫權奸情流卽其次

小園種花時不得郭橐駝其手補造化其心備天和全活
在人爲生機物云多此身有精氣白駒牛馬過撫心長歎
息風塵易消磨

小鳥

小鳥名難辨低飛轉不窮常虛鷹隼逐縱入網羅空暗葉
尋蟲細柔條啄果紅笑他九萬里終待北溟風

野花

幽徑疎花放晴林細露明有香還自惜在野不須名游屐
樽攜過春風候至生滿園桃李豔車馬正縱橫

濁酒

濁酒何人造權斟過此宵我猶呼玉友君實愧金貂靜夜
三杯足春風一度消哺糟心最苦醒眼轉無聊

故劍

龍泉出塵匣四壁動光芒酒罷照霜月
鐙昏卽戰場飛騰隨候至珠玉待城量
此腹容卿輩恩仇望汝忘

登泰山

清晨躋天門流霞自東偏絕巘紆石磴
瑩徹諸峯懸水簾白玉光錯彩復嬾娟
瓊簫忽相引松風爲周旋羽士好顏色
飛步憑松巔邀我坐黃峴玉井清生煙
渺渺蔥鬱中下界蒼蒼然揮手更梯雲
白日極頂圓豁焉出天地披襟歌懷仙

飽飲王母池清風來天門颺颺披塵襟
毫髮自飛翻玉女拾瑤草皓月臨金盆
流液一浣濯閒身爲之尊俯視梁父山
蕭蕭御道存七十二君封恂怳復何言

東上日觀峯遐矚天與平東海直衣帶何有飛溥驚隱約
桃都山身如浮雲輕桃樹手可接如聞天雞鳴萬籟爲之
伏九垓盡一聲須臾動天地水光徹蓬瀛回首望舊鄉高
呼衛叔卿

醉把白玉壺靜對磨崖碑方士與儒書終焉將奚爲睥睨
五大夫又何有李斯古人究何往停杯一問之欄南雙白
鹿高峯行遲遲穿雲者誰子振衣采紫芝

對松山絕奇石立森雲關萬狀不能名青錦皆古顏松石
渾欲化恍在碧落間滿耳發笙簧疑有九龍還我非求仙
人自喜征塵刪叩關探玉策轉愧心不閒

程高士穆倩見過寺寓

條條杖屐往來輕載酒看花逐隊行門掩舊京千里客交

論古寺百年心世傳駿骨多歌泣君借蟲書識姓名因歎
信陵人散後興亡猶得問侯生

邗上遲燕峯費先生不至

遙想城南水竹居滄桑歷徧近何如興酣載酒難尋客貧
到關門只著書芳岸飛花閒畫舸朔風吹雪阻柴車相遲
共躡金山頂萬里江山一照餘

問津園

一抹疎林萬點煙漁人網集亂汀前紅衫青笠垂楊下引
得溪光上釣船
筍屐荷衣入翠微小亭把酒對薔薇野花香破半溪冰白
鷺一雙松頂飛

北邙山

北邙望不極，滢滢水煙平。讓嶽峯難矗，支河勢自橫。夕陽
荒草樹，亂冢盡公卿。但進一杯酒，何須身後名。

張壘字聲百，撫甯人。康熙癸酉舉人，官內閣中書。有秦
游詩。

秦中詠古

驅車樂游原，東下鴻門阪。草木半黃落，淒其歲云晚。當年
宴會處，衰柳拂行幃。古人竭智勇，機事如環轉。南鄭幸西
歸，彭城竟東返。歧路在須臾，得失迴懸遠。歎息俱陳蹟，徒
旅去偃蹇。且就夕陽中，野人原上飯。

江南曲

別君復幾日，葵穉當門多。刀錢重腰帶，秋風動綺羅。七綵
芙蓉帳，紅衾疊寒波。秋夜長如此，寂寞金閨裏。梁上難同

紫燕飛鏡前擬作青鸞死思君憶君不見君江南夢化隴
西雲前日緘書渾是淚不須更驗石榴裙

春宮詞

宮井新梧綠雲樓起睡鴉幾番添鳳髻曾不見羊車恨瀉
芙蓉粉愁生蜥蜴砂昭陽春早入定有合歡花

曲徑和字綠

碧篁遮曲徑習隱可年年適意卽爲道齋心亦類禪蘆深
人語寂花密磬聲傳渺渺山禽下飛來破暝煙

送吳蓮洋歸河中

柳絮飛無賴君歸灞水東溪臨衫影綠花踏屐痕紅此去
風生袖重來詩滿筒飄飄笑韓眾空老嶽蓮中

常安字履坦滿洲旗人康熙癸酉舉人官至浙江巡撫

有受宜堂集

詩話屢見學於韓文懿通經史能文章集凡五刻曰醉紅亭集曰瀚海前後集曰播水三春集曰班餘翦燭集曰駐淮集又編廿二史文鈔古文披金論著甚多往往援古刺今譏切時事中盡語死非其罪論者惜之

永平府南臺遠眺

策馬上南臺崷嶸高百丈雲氣溼征裘烈風驅塵埃爛然
金碧浮琳宮足幽賞午鐘度松林空際有餘響左右列名
山冬寒似秋爽懷古一凝眸遺風猶可想

讀漢書

耳餘刎頸交其固如膠漆一旦利害臨易轍成仇嫉吾觀
古君子澹然談接膝持心如鏡平何嘗指白日廣交與絕
交兩論俱可黜

朱郭有心人急難得相救行雖非中庸氣自橫宇宙樓護
與原涉所著一何陋本以詐得名羣豪乃輻輳始知游俠
中亦有稂與莠

題墨荷

蓮葉蕭梢剩綠房荷花零落損紅芳懸來水檻涼風起知
是荷香是墨香

張瓚字爾石一字錫田湘潭人康熙癸酉舉人官平度
知州

月夜至湘陰次華六夢鹿原韻

擊楫輕千里歸帆自遠天暮雲青竹戍夜月洞庭船岸火
近偏暗蘆花秋更妍故園風景好相對已悠然

馬上口占

靄靄寒煙澹落暉
幾行官柳綠成圍
長安春色渾無賴
鴉鳩聲喚客歸

段標麟南甯人
康熙癸酉舉人
歷官灤州知州
有蠡屋集

賈島峪

石菴芳草碧離離
猶記詞人託迹時
春雪馬蹏朝去國
秋風渭水夜吟詩
簿書差勝爲僧日
瘦削應同未第時
萬里三巴空涕淚
客心應共峽猿悲

陳養元字正求號鹿山
又號芷濱
武陵人
康熙癸酉舉人
官甯國知縣
行取主事
有鹿山詩集

東津橋看山

雲多不礙山
雲去覩山質
東津縣左腋
橋與西津匹
奇峯

耳其來言 卷三 一四
高入雲變幻狀非一不識面目真有時露腰膝好山如好
女防身恐不密萬古抱幽真蛾眉誰見嫉中有採芝人傍
崖種丹秫心與泉石盟靈妙始挺出

泊黃州

岡山曲屈鎖江流何處春光上客舟一徑草荒人迹石半
城雲覆月波樓垂楊不繫青溪夢微雨偏生碧簟秋把酒
臨風歌古調渚蘋沙鳥起閒愁

廖鳳徵字樾阡一字芸夫號聰雪江南華亭人康熙癸
酉舉人官林縣知縣有翫劍樓詩橐

懷陳明府荀少

君宰臨湘日葦湖映底精彩毫春判牘黛色畫橫城正有
江山興淒然風樹情麻衣沾血淚歸騎雪初晴

高閣凭遙岫孤吟君未來誰家秋釀熟野徑蠟梅開殘雪
荒城寺斜陽古戍臺郵程百里外馳望數徘徊

秋思

一雨翠微寺晚風黃葉林登山康樂屐誓墓右軍心百里
巖城僻五湖秋水陰肯將雙短鬢長此戀華簪

梅以燕字正謀宣城人康熙癸酉舉人

詩話正謀勿庵子文穆父也刻苦自勵能世其家
學母喪哀毀致羸疾得導引術而愈仍先勿庵卒

閒適

絕無塵處做雲扉因病翻能久息機求仲儻來堪破悶少
文孤往輒忘歸幽禽過午啄花片老樹經春換薛衣長物
那關身死後古來名士謝宏微

曹源郁字璟含號樸存嘉善人康熙癸酉副貢官慶元

教諭有東園吟藁

宜興道中

欲放江陰棹，翻成罨畫游。峭帆衝暮雨，孤艇送春流。竹樹煙中亂，樓臺水際浮。鶴沙橋下路，帘底故句留。

朱軾字若瞻，號可亭，高安人。康熙甲戌進士，改庶吉士。

授編修，官至文華殿大學士。贈太傅諡文端。

詩話文端爲世宗朝名臣之冠，正學高風，原不以詞章增重。謹錄一首以誌景仰。

贈毛心齋

峩峩鹿洞講堂開，萬古精靈發越來。聖主崇儒垂切問，熙朝選牧必良才。光風霽月君新領，古檜蒼松地舊栽。從此洪鐘時一叩，不教庭廡翳莓苔。

高其倬字章之，號芙，昭漢軍旗人。康熙甲戌進士，改庶

吉士授檢討官至戶部尙書諡文良有味和堂詩集

詩話文良淵深疑重勳業爛然而其詩有云詩外更無餘事業酒邊時作小淹留其天懷可想平生言不虛立故所存無多最工五言長古如碧雲寺蘄州新城等篇託意深遠聞者足戒當與饒花之九成宮玉谿之行次西郊並傳望雲山一篇燭照幾先詩通於政其流連光景之作如萬柳塘云白蘋風細魚苗長紅杏花深燕子低體物瀏亮中亦復別饒韻味生平自許其詩頗似元相又與陳南麓論詩云無益在所屏有作非苟然皆證三昧後語也

游萬柳塘留贈天倪上人

佳境天教與老倪無邊光景到招提白蘋風細魚苗長紅杏花深燕子低勝日正當春社後好山都在曲闌西他時講席容聽法萬柳塘南卽虎溪

蘄州新城

于役季冬月東入漁陽城城圯五十載奉詔新經營塘堞

一云具築作功遂停胡不事宏麗役物勞皇情此州實險
要世界方昇平長馭控八極內地固所輕昔當明之季置
鎮藩神京高起兩重郭徧徵九州丁城中貯芻粟城上羅
旗旌薊門大帥任鄭重屬老成高議百僚會推轂千人英
且復命丙魏不啻求韓彭陞辭涕汎瀾密詔言丁甯志鳴
伊吾劍意洗魚海兵長計一蹉失塞馬仍縱橫連營一日
潰列障同時崩塵來白日匿燒猛蒼天頽九門戒樓櫓六
府嚴關扃平安一星火重比千金瓊傳呼達禁闥夜寢始
不驚外召勤王師內辦遷都行下詔責專閫幕府空搶攘
擁兵不敢救閉壁如聾盲偵敵已出境追騎甫及垠殺人
取其元受賞都堂廳壘疊鞍上級一一田間氓更奏塞外
勳肯恥城下盟懦帥肆欺謾勅敵生門庭旣以殺其軀患

亦貽朝廷嗚呼厲有階未誰滋亂萌或云右文士誤國由
書生或云吝邊餉飢卒難力爭南史與董狐百喙同一聲
敢獨曰不然奄寺實萇熒監軍專將柄司禮爲阿衡眾賄
水輪海百度禾生螟榜笞殺壯士羅織戕名卿剛鯁靡子
遺媿媿忘忠誠肯效鷲鳥擊轉畏走狗烹潢池弄兵子竟
射承天閣緬維開創初明祖垂家型內官止四品灑掃供
使合外事付卿貳著戒在屨屏孰畀鐵牌毀坐見九鼎傾
惜哉興戎首未正司寇刑我皇法殷鑒典制原六經寺人
無官階置員有定程衣冠帶履外越者誅竄并皇皇一王
法萬世其勿更願獻五百字勒作城隅銘

夢覺偶成

織女斜河夜氣清殘缸耿耿澹微明天涯夢醒無人見月

照虛廊絡緯鳴

見其集言卷三十一

九

清橋驛曉發

高原鐘後見晨曦
水外殘雞尙喔伊
槐影半村煙綻處
禾香一片露晞時
纔穿雲過捫衣潤
欲覓詩行任馬遲
入棧漸深山漸好
卻忘踪跡在天涯

曉行辭

村雞喔喔月墜煙
眾星盡沒明星懸
行人相向寂無語
風吹黃葉墮我前
鴉集平沙亂無數
曉角一聲飛上樹
遠綠茫茫煙草深
愁來重對前年路

劍門

兩崖對起削雲根
邸閣全傾佛寺存
千古衰興幾蠻觸
一龕鐘鼓自朝昏
無人戰鬼嘯清晝
不夜於菟到驛門
蜀道

荒涼身萬里不聞鈴雨亦消魂

渡綿江

江煙漠漠白鷗飛倚棹中流看落暉
涪右水從中壩合劍南山到左綿
稀孤松遠岸如人立游子他鄉見
燕歸又是
一年秋欲半荻花風起鱸膾肥

望雪山

蜀山岬岬皆參天雪山高壓羣山巔
劍嶺巫峽總培塿青城峨岫羌隨
肩禹跡不到失搜紀遂使岳鎮居
崇班五丁有力不敢鑿胚渾元氣
無雕鐫到今尚存太始雪盛夏早
似初冬寒我來成都苦卑溼每遇
高爽心安便入秋十日九陰雨側
身西望空長歎忽然金風掃羃翳
半空橫轉兜羅綿素雲一段落天
外白頭卓立羅煙鬢天門玉龍露
寒

鬣海風吹水排銀瀾數百里外一舉首爽氣已到鬣眉間
豎指數峯帽欲墮如坐井底窺星躔壓覆常憂坤軸折迴
旋怕觸曦車翻高鳥之翔不敢度往來或是飛空仙此外
茫茫復何有蜂屯蟻聚叢生番乃知造物有深意區界彝
夏分中邊刀州刺史且好事欲通天險招呼韓橐駝載布
馬載粟羅致火罽收冰蠶去年行臺留陸賈今年絕塞歸
張騫似聞西方諸部落稽首請事天可汗蜀人弱脆蠻頑
姦畏之不啻雀見鷓況復此曹不耕織毳衣肉食勞縣官
安得天上巨靈手擘山爲塞叩峽關

同人元祐觀看花小飲

一絲朝雨減輕塵十里嘒鶯碧樹新驕馬頻嘶曾到處疎
松全似不羈人百花影裏嘗騰酒三月中間爛漫春誰道

金門無劇事年年風景趁閒身

獨坐感懷

九十春光欲二旬催花風起落鐙辰年華半向愁中盡生
事惟餘懶處真託意漸諳吟楚雨閉門長似在漳濱賈生
未辦千金賦目斷天涯輦路塵

詠香與顧書宣陳南麓汪安公同賦

掩冉清芬散細縕薄霧微未濃飄欲斷漸遠擬仍飛侵曉
生芳徑因春上舞衣輕呵妝後鏡寒下夜深幃湯殿融融
水蘭缸夜夜輝一星篝火爇六曲繡屏圍月榭初經雨鄰
花不掩扉蝶回知有恨風定若無依錦薦餘温在羅巾舊
事非背人勻麝罷臨水握蘭歸蕩子同韓嫣名娃勝鮑徽
辟邪須作珮莫只重珠璣

曉仙謠效溫飛卿體

明星出地月墮城白河斜挂西南楹
丁冬細漏咽殘響蘭缸短燄青熒熒
隆準翁孫赤龍子夜看真圖倦朝起身輕
夢入蓬萊宮弱海三千一杯水七曜迴光照玉堂
倒持北斗傾天漿綠華舞落玉條脫醒聞墜地聲
鏘鏘半尺瓊籤報天曙宮女起收仙掌露
通侯更拜白茅人歲星卻入中郎署

放鷹行

廣原兀兀天四遮樹頭月落吹早笳
將軍錦袍金鞵寶弓六石馬五花從者百騎寂不譁
班駝赤驃驢駟駢頭並驅如排衙
鞵上角鷹嘴爪佳曾肉妖狐搏巨蛇
金鈴掣臂風捲沙馬前一點掠地斜飛走窮促喘且呀裂毗潰腦

困攫拏舉鞭數獲載滿車雉大如鷲兔如猱炙肝燔肉傾
流霞侍兒十五彈琵琶歸來猶作三日誇相如豎儒井底
蛙如何上書諫大家

宿翠微寺

林樾互蔽虧岡巒相枕帶徑迴雲磴高谿轉石梁隘迸泉
灑人衣衝風振松籟煙生墟里間日下牛羊外步履隨昏
鴉聞鐘宿香界

碧雲寺

崔巍碧雲寺壽安山南陬前貌眾龍象後植干松楸于經
首作俑魏豎復效尤規制駭心目宏麗無匹儔近屏羅翠
嶂遠勢交迴洲石室窈中空繚垣屹外周鏤階鳳雛礎琢
壁龍螭鏤僭侈陋陵闕豈止逾王侯當其繕構際乾坤困

徵搜攻石千仞岡輓材萬里舟蒼生莽流穴四海輪驟賊
竭彼血萬斛就此土一抔刑餘胡敢然童昏寄垂旒軫臂
奪之柄蠱腹心舌喉鉗質殺喬固軒墀延共兜上擅天賞
罰下快私恩讐敵張寇盜熾木蠹禾生蝨罪雖淪一族禍
乃延九州高廟血祀斬泗社蒼煙愁思陵葬無所麥飯矧
可求昌平寒食日春慘風颺颺民家敗紙錢吹挂陵樹頭
窮奇舊衣冠乃得歸巖幽百年有餘恨烈士涕橫流偉哉
張侍御一洗異代羞仆碑刻名氏伐豕爲平疇茲事良義
舉我更借箸籌賢聖律既往爲後世罰褒善固揭百世惡
亦昭千秋誅姦賴直筆不繫豕去留上世戮鯨鯢封骨高
嶒嶒請肆彼遺骼存此招魂邱用之作京觀事異理亦侔
覆轍留眼前後車庶迴轉殷墟歌離黍鑒之者有周作詩

述胸臆以俟采風輶

送陳南麓同年之奉天府丞任

甲午夏月次鶉火陳君東去丞陪京月題之輪約青憶翩
翩白馬懸朱纓風吹蒼髯拂肩領長身突兀雙顴頰後車
輪困載墳卷前驅合沓羅旗旌路人如堵看祖帳客前陳
辭酒再行山海之東富奇詭水產陸孕紛千形熊肪三寸
削玉白鱗鯉一丈如龍猶活倚挺鹿掣生尾癡掩雛雉披
柔翎巨蛤腴腹瑩見子芽蕨拳飽肥稅萌八梢偏口略粗
俗黃羊水獺猶羶腥君到正遇八九月應饗北食忘南烹
郭外日紅看放獵月輪壓地排千兵鸛弓可手稱鸞箭馴
駒口熟知人情馬上射生下草檄吏卒喑嘍官寮驚書生
如此良不惡行矣最樂餘何營我時避坐亦爲壽敢有所

獻君吾聽蒲河鐵嶺我故土身雖不到心能明皇家大業
首遼瀋有漢關陝唐汾并膏原塊北二千里崇墉岌業一
十城薇局中開應箕尾王氣直上聯魁衡已聞方召降喬
嶽宜有董賈鍾菁英後生無師孰埏鑄適喜碩彥司膠鬲
願稀射獵課文史數親短檠疎長檠別裁譌體定塗軌披
汰瓦礫搜璜珩中和樂職正宜作子淵之後君再生大海
泱泱浸日出長山矗矗撐天青縱探極目厲其氣推排河
岳鞭風霆發爲聲詩被絃管常武是弟綿是兄便就童子
覓何武或有骨骼堪公卿采風九牧貢軒陛升歌一闕通
神靈咸池雲門見光景金泥玉簡基云亭君不見元和韓
碑睨典誥劉詩柳雅窺齊盟生平羞與曹檜伍歸其眎我
當繼聲

閒行與文震青編修同賦

曲徑緣溪曲平沙似掌平
波心雙鷺沒雨外一峯晴
官冷閒游數時和夏氣清
橋東村北路留待月中行

不寐

螢流高屋影相追
水外疎星拂地垂
吹縹葛衣風漸緊
滴殘蓴夢漏初遲
三秋似月纔生魄
四序如花半在枝
礎韻蟲聲愁幾許
旅人雙鬢最先知

法海字淵若號悔翁滿洲旗人康熙甲戌進士改庶吉士授檢討官至兵部尚書有悔翁集

游棲霞寺

石磴迂迴上蒼藤
挂薜蘿嶺開千佛古
松記六朝多明月
何曾改荒碑看已磨
雲霞棲隱處我欲問巖阿

呂履恆字元素河南新安人康熙甲戌進士官至戶部

侍郎有夢月巖集

王阮亭曰夢月巖詩高渾超詣正以不甚似杜爲佳
沈歸愚曰當時言詩者多欲尊宋祧唐司農志趣
不落唐以後并斬追六代以上而從之可謂特立獨
行又云蘊含前人別裁僞體一切鬪花儷葉粉黛纂

組之習悉
舉而空之

詩話元素詩有七子遺音命意瑰奇結響蒼越非優
孟唐賢者此詠古尤多警句如董江都祠云長沙有
傅相先後東閣何人足重輕岳王墳云宋宗有志甯
忘戰張相何心亦忌才信陽懷何大復云客傳白雪
音難和士附青雲怨易多金陵雜感云但令江左夷
吾在豈畏荆州處仲雄史司馬墓云周鼎旣遷無義
士武庚猶在有頑民皆論古有識氣息
醇厚在國初中州諸賢中當推大家

新婦篇答雪堂

習習堂前燕弱羽詎能飛仰視滄浪天哺我黃口兒新婦
初來時父母教禮儀婉婉事君子動止勤自持入廚滌百

器夙興夜寐遲未知姑性情便欲摠所思一語違尊章憔悴無光輝君子爲彌縫大義終無虧同心依所天德音矢莫違

桑條明沃若鶉鴉聲欲展提籠陌上行盈盈衣露泣伯姊念孤征導我步凌緬中心旣綢繆言笑亦游衍三月采青蒿四月簇黃繭將爲公子裳區區效不腆同居向三年君忽被驅遣不敢出中門心與車輪轉涼秋八九月木落枯蓬捲不惜道里寒終身事未葳舅姑祝悅康兒女願黽勉君懷亮孔深我績日猶淺海畔亦逢君攜手望高巘衣裳非舊時容色尙婉孌皎日會東出谷幽當自顯

由龍泉寺西上觀源所自出遂窮其勝

飛雨吹絕壁炎氣爲清和泉源在木杪空響何其多緣險

捫弱葛出幽履垂蘿峯嶺非一致緬邈復逶迤夔然至天
表雲氣如流波陰陽屢晝夜日月相盪摩下視所來徑猿
鳥幾經過心疑此宮觀結構非斧柯不知初古人何以栖
巖阿

祖越寺至羅漢洞

空山寂無聲鐘磬自生響宛轉松石間忽來雲鳥上筋骨
未遑安耳目已豁朗巖腹正中穿出入隨俛仰混沌誰開
鑿玲瓏非意想仰視縹緲峯天表撐一掌其上有飛觀安
能度表廣自非餐霞人邈然不可往

關門行

哀陳公也公諱顯元楚之蘄州人崇禎壬午

邑皆墮公率民登鐵門砦日夜守陣不爲動賊檄
公公碎其檄大罵賊怒并力攻之砦破無少長皆
屠公走且呼曰糾民守死者縣令也宜殺某勿苦
我民賊不願公持其刃呼益急遂殲焉其子某亦

與難遺民三十六人者爲
負土成墳予聞諸父老云

澗水奔山齧石根逆流百折趨鐵門鐵門山上壘培在居
民曰是陳公屯瓦礫崩翻燒黔黑荒冢草白天黃昏猶傳
壬午世反側函谷關潰無完邑我公陟巘關巘石率民守
死勿降賊賊覘睥睨聲方怒謂若區區何自苦公笑不答
揮礮石槌碎檄移置狗鼠黃巾萬眾并牛力飛鏃滿眼天
地黑累卵難支巢樹傾蒼顛黃口遭刳磔更張空拳無所
懼齧齧血頸身不仆同時哲嗣亦遭坑遺民負土營雙墓
已矣哉天柱地維昔崩摧金城鐵甕空崔嵬北門鎖鑰墮
燕薊上東門亦軍延開翻城倒戈皆如此嗟公爲此一何
哀春來杜宇猶嘯血瓦棺不朽常山舌落落青山三尺堆
常照松風萬古月

甯鄉坤元宮雙松歌

雙松東西互爲友丹楹粉壁江聲走枝幹排雲入窈冥萌
蘖不知何代有東株倚戶半敲斜滿身苔蘚生霜華雷霆
忽起蛟龍怒掀翻鱗甲張爪牙有時風靜日移晷青陰覆
殿涼於水元氣茫茫混太清幽叢寂寂栖神鬼近西一株
獨正直亭亭上出千峯碧流膏入地似黃金偃蓋扶天蕩
白日主人延客坐其側舉杯不飲皆自得與君同結歲寒
心隨天自布陽春澤嗟哉雙松的的有根株後萬斯年仍
不枯薜華朝菌胡爲乎

石樓行

時予以奉檄覈倉同官程明府勉齋適有發陳之請因高其議作此以俟採風

石樓城郭山之坳苦菜青青盈四郊犬吠間從猿嘯起人
煙時與山雲交阪田礲确不可井高高下下隨窟巢城外

通達無軌跡側身半趾垂巖石我車我馬何爲者公家積
貯相推覈周官斂散本藏富詎非補助爲農食况逢堯舜
憂民時忍令鼠飽我氓飢明宰曰予請發之權衡調劑仰
臺司必從所請復奚疑幸甚哉石樓雖瘠民不罷

梁州

蜀道天難上梁州路已遙岷嶓蟠北戒江漢導南條落日
七盤嶺晴天萬里橋獨留懷古意歌哭未能銷

別楊貢士臣石

江渚秋初至山城日尙暄臨歧頻駐馬將淚更聞猿細故
宜從衆澄心莫放言械通隨道路不厭往來煩

薊門雜詠

景物川原裏間關歲月中官榆叢自碧山杏遠能紅沙壅

桓侯壘雲封堯母宮不逢燕趙士歌哭爲誰雄

邯鄲春欲盡楊柳不堪攀花落叢臺驛人歸銘水關存亡
輸白璧旃養棄朱顏卓犖觀千載生涯有故山

漁泛洪待家兄文啟言懷

簿領汾州去長懷鄂渚遙塞鴻淹次第檐鵲望昏朝純吏
家難稱頑民勢易驕何須悲雨雪見現自當消

時兄緣事
暫解任

野望

子真谷口雲初霽白起城邊雨乍收萬里濤聲來漢水一
天霜葉下梁州他鄉風俗重陽晚故國音書旅雁秋人事
寂寥裘敝盡寒砧莫遣近高樓

潼關用嶜峒元韻弔孫司馬

漢京形勝枕雄關指顧山川一掌間地險半開函谷月天

青惟見首陽山中官賜劍來何疾司馬麾戈去不還萬古
黃河流血淚春風慘澹旅人顏

登龍門山

禹門山色碧千尋萬古長祠夏德深河自懷襄開草昧人
因疏鑿重登臨風雷實見魚龍氣雲水虛涵天地心不信
滄溟難可到桃花竹箭尙浮沈

金川門詠史

金川北望日黃昏聞道燕師入此門不見古公傳季歷祇
知太甲是湯孫風雷豈爲鴟鴞變江漢難招杜宇魂南渡
降旗何歲月西山省恨舊乾坤

鞏縣嚴子陵祠

霜落秋城木葉丹客星祠畔肅衣冠故人無意驕同卧天

子何能屈一官嚴瀨江山空浩渺原陵松柏自高寒東都
多少知名士不及冥鴻一羽翰

山海關

天際重關虎豹扃前瞻雲樹尙冥冥山餘落日千峯紫海
瀉遙空一氣青漢塞烽煙亭壁壞秦城膏血土花腥慢吟
碣石東臨句絕代雄才敢乞靈

秦州詞

嘉陵江水向西流大散關南天正秋一夜猿嘯楓葉落征
人十萬下秦州

登封許由冢

青山頂上一孤邱俯視陶唐十二州偶使人間知姓字遂
教潁水挽清流

周起渭字漁璜號桐野貴陽人康熙甲戌進士改庶吉

士授檢討歷官詹事有桐野集

毛大可曰先生詩興比互進情文兼生古可追魏晉
而今體聲律不出開天間陳松山曰澤州相國在
直廬聖祖問今詩人舉周起渭史申義對一時輸
林有兩詩人之目於查初白德尹尤爲心契初白次
先生高廟僧舍詩云結習多生未易捐得公投句喜
楚然祇應借佛論詩境何法真超色界天自注時以
拙詩就正先生史蕉飲贈句云孰
與夜郎爭漢大手攜玉尺上金臺
詩話獨山莫子偲編黔詩紀略松山同年踵爲後集
康熙以還舉漁璜爲標幟同時張豆村論德後來田
安陸端雲潘檢討南垞諸家足相驂靳黔詩堂廡甚
大非必偏尚一宗而滑幹堅實藻韻不置道減以來
鄭莫代興沈酣典籍益以交游登覽之助蔚爲西南
二子揆其風格實有淵源近人亦或譽之太過殆未
諗黔靈文采
所從來遠也

寄答襄城劉太乙

天音雷奮蟄地籟風號穴鳳鳴覽德輝鳩唳催暮節東風

吟百鳥不獨梁間鳧寒蟬與蟋蟀感秋復悲慄氣化使之
然機至不容遏此或緣知覺相將弄喉舌石竅本無聲水
行殊慚旧忽然相擊觸無心中音律信知天地間至妙難
理詰人聲得精微寄興尤恍惚中心良霧鬱衝口自風發
但伸所欲言豪聖莫能屈在昔周詩亡始有獲麟筆刪定
無聖人風謠乃遺逸况乏輶軒采貞淫誰纂述古今有遷
變何曾音韻歇正聲本無恙文士自爭奪特起求名徑真
詩乃淪沒此道宋元時猶未事傾軋原體本騷人後來俱
派別英雄當運會各與時相匹譬如喚晴鳩亦有知雨鵲
那將堂上竽遽厭堂下瑟有明宏正時何李氣蓬勃師資
浣花叟餘子遭割截遂鉗萬人口攘臂稱渠帥才高任軒
輕流弊始紛出浸淫嘉隆後壇坫益增設同流合涇渭仇

讐分吳越王李及徐袁操刀起相殺古詩丁厄運古句肆
批抹彈指百年間詩場三喋血流傳到今日狡獪又一術
各懲門戶非萬象思囊括借口愛前人其實事剽竊遂驅
後來秀點鬼而祭獺狴牢錮情性音形圖髣髴刻舟信可
求未苗已先堰河洛天地中真聲宜未絕劉子不羈人心
細膽雄拔披讀古人書落華將討實向者攜手時議論何
明豁風詩有正變天然任流溢先須覷大幽元關闕窟窺
然後颺九天風雷共吹映寄我五字詩字字紙上活直如
排霜筠曲似拗勁鐵我詩但意造無文空直質本乏求名
心信口無爬櫛文章在吾輩於技等豪末讀書不明道哆
口徒浪說縱令言語工根源已先失而况竊古錦紛紛爭
割裂請觀古人門千秋何嶄嶮自來爭名輩頸漲面駢熱

赭山求楮竹不能供紙札盛氣凌前人何曾躋毫髮我作
不鳴蟲冬寒瑾房室談稀舌本強因君偶棖撥遂敲古瓦
冰含豪濡禿鬣懷君結隱處汝水前蕩滂滂籬落蚤煙開衡
門數峯雪想見將吟鬚搖頭聳山骨何當塵土手往結淩
波襪報章比芝菌驚雷出枯枿更待新詩來披襟弄明月

題查聲山學士花溪石濑圖

落落長松陰清溪一道深潺淙厯危石宛轉入花林素鮪
樂空水鳧鷗卧煙溽石上垂綸客臨淵非世心
春風吹釣絲偶逐蜻蛉起還同花溪魚嶺濛花溪水長空
寫潭影澄懷澹如此出處偶然事論心付葭葦

太宰陳說巖先生命題王石谷畫午亭山村圖

太行綿亙北州野處處峰巒聚奔馬騰驤磊落萬不同一

一遠自青天下神靈窟宅誇雄尊西邊王屋東蘇門縱橫
顧盼韓魏趙衛中山數百郡空青未了煙光繁我公結廬
王屋邊太行元氣紛糾蟠千室鱗鱗入雲霧塵中不辨桃
花源綠野裴中立東山謝安石白頭趨起爲蒼生留著煙
嵐圍故宅綸扉賜沐時情閑幅巾盤帶思家山烏木山人
黃鶴手爲寫雲巒縹緲間青山一重溪一轉山勢半舒雲
半卷遙天漠漠風雨來蒼翠浮空沒層巘斯須彩暈山前
生亂鋪錦繡林壑明驛梅官柳傍前路溪橋野店行人行
行人路轉前山曲側峯橫嶺看不足枯柏杉篁一徑通人
家散滿千花谷谷口人家經幾年晉時耕種秦時田漁郎
舟子偶一到竟疑此地皆神仙神仙愛山不住山青雲鳴
玉趨眞班自來力牧風后乃仙伯豈有山澤之癯能活國

君不見我公身侍玉皇香案四十秋素心日向林泉游出
山更復攜山出五嶽真形隨杖頭腐儒不辨經綸事祇是
未諳山水意豈如真儒江湖魏闕藏胸襟天然林壑無招
尋松泉百道交情音慷慨寫之梁父吟出和虞舜薰風琴
勳名如山力所任我心無時無山林王屋高高丹水深吁
嗟平方知古來伯仲伊呂者一生皆是巢由心

分詠京師古跡得明成祖華嚴經大鐘

鐘在萬壽寺鐘內外書華

嚴金剛諸品名經八十卷沈學士度筆也

鴻溝不割新亭毀南兵百萬刲羊豕九江夜盜魚鑰行金
川門開鼓聲死袈裟瓶鉢嗣皇髡忠臣十族飄冤魂高皇
鐘簾幸無恙不歸異姓歸宗藩九鼎遷移太倉卒燕山戡
戡建宮闕銷鋒鑄鏐一鐘成要比銅人高突兀當年殺戮

成邱墟憑仗佛力相懺除金剛華嚴八十卷蒲牢腹背分
明書一字懺除一寃命字少寃多除不竟鐘聲夜發老狐
鳴頭戴髑髏暗中聽祇今事往三百年零落草棘依荒煙
紅牆碧瓦半銷毀道傍翁仲行人憐憶昔索銅山海竭縣
鐘十丈龍頭楔銘勳不紀道行功燬塗卽用齊黃血沈生
字體平不頗銀鉤鐵畫星駢羅甯知青史但一字比較鐘
鼎尤難磨骨肉相殘悲已事憾留此鐘閱三世樂安州外
見俘王南城宮中伴幽帝此時老佛西南行荒陬一卷楞
嚴經歸葬西山不封樹到今談者淚縱橫金石壽長人不
能彈指千年多廢興君不見米脂賊來箭如雨原廟編鐘
散無主萬歲山頭悲尺組帝子王孫無處所血濺長陵一
抔土

送馬河宗令巴陵

一舸湖南去官閒事事幽山川麋子國煙雨岳陽樓橘社
龍宮近江花帝女游鼃鼃春恨闌窗外看漁舟
老瀛爭衡地魚龍戰血腥廿年烽火盡千里稻田青水驛
通吳會雲帆滿洞庭恩波流處遠更勒紀功銘

金陵懷古

鍾阜猶存王氣銷石城自打晚來潮行逢舊燕烏衣巷偶
聽殘鶯白下橋風月一天袁虎詠衣冠滿地阿龍超臨觴
莫漫悲千古六十年前是六朝

賭墅風流誤後賢屢朝狎客遞當筵宮車慣入鴛鴦寺臺
閣新翻燕子箋千載埋金悲故國十州鎔鐵鑄當年停雲
歌歇行雲散斷送繁華尺五天

江孔傾危不足論，可憐名士亦脂脣。
犢車詣闕甯非妄，翟芾蒙塵豈是真。
削枋南流滿淮甸，迴戈東指下湘濱。
帝星長白增芒耀，前路驅除定有人。

爾汝歌如水調長，江南江北共淒涼。
不知橫鎖千重斷，尙戀迴舟一水香。
紅豆按歌空有淚，庭花比玉恰逢霜。
到今無客悲禾黍，舊院人還說頓楊。

漫興

九陌輕塵走鈿車，閉門書帙任橫斜。
茶香易醒朝來酒，睡美妨看郭外花。
垂柳漸濃鶯識路，畫簾初捲燕知家。
客途縱有風期在，苦爲春愁益鬢華。

立秋南麓書屋小集

柳外一蟬涼氣生，迴廊接座有餘清。
寒花映日將何待，老

樹迎風漸不平鬪飲客如秋鶻健吟詩我作候蟲鳴離心
最易關搖落一曲汾歌萬古情

己丑初秋郭于宮招集江亭寄懷千波耑木德尹諸

君子

葭菼連天鷗鴉飛碧山如畫遠相依朝煙暮靄遮城闕
敲岸迴塘有釣磯野水逢秋寫衰鬢林風傍晚入生衣雲中
一道旌竿直誤認帆檣欲送歸

德州感懷田山薑先生

詩卷長存萬事休十年黃壤閉風流人歸畫扇齋如故春
去山薑葉似秋雨後漕河渾更急道傍官柳綠含愁羊曇
漸老無多淚忍爲停車一少留

泛舟西湖夜半始歸

天邊明月光難并人世西湖景不同若把西湖比明月湖
心亭是廣寒宮

滿保字九如號鳧山滿洲旗人康熙甲戌進士改庶吉
士官至閩浙總督有檢心堂藁

仲春七日朱撫軍邀至湖上偶成

山水清音晚更調梵宮隨處可逍遙籃輿穿碧聞溪響雪
岸抽黃見柳條談笑暫時拋案牘隄防終日爲江湖艤舟
且向孤山去攜取寒香到酒瓢

韜光

戶外雙峯散午晴江湖分繞越王城何當留宿山僧榻破
曉來看海日生

陳瓚字文煥號眉川海康人康熙甲戌進士由知縣官

至福建巡撫贈禮部尚書諡清端有詩集

詩話清端會試出孝感熊文端之門深研性理諸書甲申渡臺灣遭風折桅舟中讀太極圖說西銘諸書不輟寄子書有曰自出門來抱此數書日夕尋玩自信頗有所得特達之遇又儀封張情恪所薦舉也

遊鄧偉南園林

煙火絕人處綠雲搖翠陰微風颯鳥緩細雨落花深徑曲
苔黏屐潭空月印心市朝塵瑤集雅趣羨園林

過飛來寺

山堂說法錫先飛一度南華久不歸絕頂峯巒開法眼嵌
空蹊谷護禪扉木魚聲細留花雨明月更深上釣磯可是
攀援攀未得清風竦竦動征衣

登紅毛樓

卽赤嵌樓荷蘭所築也臺灣府志云云雕欄凌空鄭氏以貯火藥軍器

量移海外乍逢秋憑眺依稀古戍樓烽火驚心成往事清

笳入耳散邊愁盈盈帶水孤帆杳漠漠晴空白日悠更喜
澄清雄鎮畔飛雲歛忽渡江頭

行越嶠道中

隋志邛部有嶠山元和志在邛部縣西南九里嶠水出其下州郡以此名

天下崎嶇路無如越嶠西重山復重壑但有杜鵑嘯

屠沂字艾山號酌滄孝感人康熙甲戌進士官至浙江

巡撫有雙峯詩集

述懷

金風蕭瑟五湖秋好趁煙波把釣舟正憶往時司馬渴至
今還抱杞人憂寸心漫許中流柱一木甯支鎮海樓南浦
歸來萬里雁飛飛長寫一天愁

陳豫朋字堯凱號濂村澤州人康熙甲戌進士改庶吉
士授編修歷官福建鹽驛道有濂村詩集

詩話 濂村文貞子入歲能詩文貞爲
授杜律居官清介自守文名重一時

礬曲至橫丹鄉道上

曉出文州門幽景恣清玩魚鳥無嫌猜花竹縟爛燦行來
礬曲東危境耳目換山勢驚嶙嶙江流俯瀾漫嵌岑孤徑
垂敲窄不容輓小輿費挽曳長繩慮中斷移趾膝挂胸束
縛衣過盃夾磴百層蘿挺霄千尺幹魄動怯虛厓力窮羨
飛翰直上艱縈盤厥下杳涯岸獨憩苔石顛坐久心愈憚
吁嗟日將晡峩峩始及半

北平射虎歌

秋風削耳塞草枯將軍夜持金僕姑一發輒殪雙於菟金
石旣貫精誠符再發不入理豈誣有心求合翻成慙漢軍
數出擊匈奴大宛苜蓿飼名駒將軍志欲封狼胥前茅後

出迷道途七十餘戰血模糊數奇不賞徒區區人事翻覆
如輓轡白雲蒼狗變須臾君不見邵平罷相還獨居種瓜
自荷青門耒

寒食還近筠連

遠役羅施國山程匝月賒去原同海角歸亦慚天涯白板
雙書笈青油一幟車新煙林薄外開徧刺桐花

灞橋

草碧雲疎浪影搖水煙初斂漲痕消斷腸橋畔天涯路愁
殺青青楊柳條

陳霆萬字紫馭平湖人康熙甲戌進士官臨朐知縣

白日

白日愁無遣青山興未孤板橋緣磧補木屐信藜扶苔色

浮碑字榕陰落酒壺他鄉拌醉好歸夢亦西湖

米調元字和梅號養石崇陽人康熙甲戌進士官江南
知縣

過荒村有所憶

春野曠無際興來惟獨行偶經流水徑時聽落花聲草宿
田廬換雲浮身世輕機心息已久麋鹿不須驚

林豫吉字不飛福建長樂人康熙甲戌進士有松址集
樓夜

野曠星偏大江冥水自聲人煙休遠市漏鼓起荒城鐙下
一杯酒樓頭萬里情風塵空老去吾亦感生成

春晴

湖海真吾事乾坤賦此生花光亂日色帆影走風聲雙鬢

天涯遠三春水國晴采蘭歌彼美笙管爲誰清

夾溪桃花盛開得野老邀酌

溪上桃花春自開漁郎煙櫂幾時來天留湖海吾爲客日
靜桑麻此泛杯社鼓忽傳江燕至鄉書猶阻塞鴻回鷓冠
野老行藏異雞黍殷勤去後猜

周鍾瑄字宣子貴筑人康熙丙子舉人由知縣歷官荆

州知府有遏雲齋松亭諸集

詩話宣子初合臺澗諸羅撫循番社興學教耕以事
忤巡臺御史爲所劾使者按驗得直泰陵深賞之
擢守荆州以關權不如額戍軍臺子德明上書請代
以免歸過荆州有句云不甘袖手聽鴻唳卻向危機
將虎鬚流民已定邱中宅逐客方歸塞外身
卒後荆州民尸祝之名所築江隄爲周公堰

題陳虎文明經象

長風入長松習習發青響雲石盤根柯日月任來往羨此

禿頂翁意氣何蕭爽綺皓伊何人悠然動長想

月夜泛舟

經年塵面恨怱怱又逐輕颺駕短篷兩槳碎搖葭莢月片
帆斜受蓼花風天從波底翻無定雲過湖心旋欲融搔首
幾回眠不得牀頭長缺氣如虹

許遂字揚雲番禺人康熙丙子舉人官清河知縣

山月

不知誰抱鏡挂在白雲岑萬壑照成雪梅花寒一林美人
此遙夜千里結愁心解帶松風下霜華流素琴

李鍾璧字鹿嵐通江人康熙丙子舉人官平南知縣有

燕喜堂集

黃汾阻風

繫纜黃沙幾晦明歸心日夜共愁生客行慣下千猿淚潮
至如聞萬馬聲世事久知同木雁羈懷何處付銀箏倚欄
極目占風色遠浦沙昏浪未平

石芳字蘭汀號雲樵滿洲旗人康熙丙子舉人襲世管
佐領有自怡詩草

山行夜歸

曲屈盤松徑蒼煙原上村斜陽依遠岸疎磬出黃昏雲憶
山歸岫人隨月到門興豪難假寐獨自舉清尊

祭星壇

石門南去祭星壇可有仙真駕紫鸞北斗無聲霜月古四
山松檜逼人寒

謝方琦字應雲宜興人康熙丙子舉人有東墅集

詩話應雲及弟皆人詩格並冷雋嘗刻詠雪亭唱和詩一門羣從皆有家法亦嘉話也

雨中送客

北風驅寒雲蕭蕭亂松兩前山忽杳冥不辨溪頭樹漁父
村外歸牧人煙中語翩翩東來鳥悲鳴尋故侶惆悵別情
人挂帆何處所

春閨詞

林外子規嗁數聲窗欲曙憐妾最傷春語語催歸去

積雪

積雪晦原陸竹村人掩扉南鄰暮招鶴不使入雲飛

雪霽

雪霽曙光寒漁蓑漾初日隔浦一帆斜前村釣船出

李永祺字鶴君嘉善人康熙丙子舉人有河干詩鈔

病起

峻嶒未怕骨如柴
排悶時時強散懷
叔夜養生終是癖
伯倫醉死便須埋
枕邊喚夢勞黃鳥
陌上行游讓玉駟
莫負陽春好煙景
且教辦取踏青鞋

送魏丈水村之燕

新詩一卷落人間
樂部流傳唱玉關
此去酒徒重覓醉
且教畫壁聽雙鬟

何梅字雪芳建甯人
康熙丙子舉人
官建陽教諭
有江村詩鈔

望接筍峯不得上

入洞疑無路
虛無接筍梢
鉤梯仙鬼半
鐵索死生交
人影猱升木
僧寮鶴架巢
那能乘羽化
絕頂共誅茅

三山歸舟

閩溪不可上上若上青天纜向峯頭繫舟從石罅穿晴空
排虎刺急瀨吐蛟涎賦命真窮薄頻年往復旋

丁佩玉字雪石昆陽人康熙丙子舉人有一槎寄草

蕪湖晚望

江燕撩人至雙飛似舊知如何春去日不是客歸時水逐
船頭轉雲隨帆腳低短吟渾未盡悵望復遲遲

嚴虞惇字寶成一字思庵常熟人康熙丁丑一甲二名

進士授編修歷官太僕寺少卿有嚴太僕集

小重陽日大雨後續城南登高分得千字

重陽風雨古語傳今秋雲物何澄鮮天公怪底號令錯喚
醒屏翳豐隆眠九日更越日有四以三乘九陽無偏飛廉

先驅號萬竅隨以颯拉噴流泉秋行夏令勢淖涸列缺吐
火施其鞭九衢淙淙注黃潦溼沒一丈車傾蹶城南高臺
竦百尺蒼波對面葭葦連煙光水氣相蕩潏岌業孰敢登
危顛豈知詩人足好事偏於造物工雕鐫重尋舊約命儔
侶羸馬滑澁泥衝驪入門頓覺檐溜斷升階忽見雲容穿
舉衣陟級試翹首皜皜晴日長空懸得非吾儕氣陵暴揮
斤入極塵昏前不然天公逞狡獪助我豪興呈清妍憑欄
遐矚萬頃碧橫雲一抹凝如煙西山新沐神女髻落霞孤
映波蒼然胸襟披豁耳目爽朝陰夕暉氣萬千翻思此景
不易得非此洗滌那娟娟雄談四起競辯囿諧謔間作飛
觥船官蛙一部當鼓吹大壑泉赴鳴絲絃籬邊黃菊不改
色茱萸續把懷香荃牢籠物象入詩態興到潑墨霏雲煙

韓蘇當代大手筆清懷小綴新詩篇秦黃卻走籍湜汗聲
牙佶屈窮迴邇譬如百谷宗大海吐納不讓支流涓良晨
美景出苦語山川笑我愚而孱蒼茫暝色四圍合寒塘雁
下烏鴉翺明朝萬口誦詩句龍山佳會還重編

甲申中秋澄觀堂讌集以昌黎一年明月今宵多爲

韻分得月字

青天高虛一輪揭纖雲淨掃天河沒清光灑漾空寰瀛人
間競賞今宵月澄觀堂中設高宴玉罍瓊壘錯肴核堂虛
簾捲通綺寮朗朗身疑入西嶠滌濯魂魄洗肝腎昏翳脫
落清冷發百壺澆腸未厭多興酣長鯨吸溟渤分曹射鬪
角勝負勝氣謹呶負含噓間以雄辯驅波濤雜出險語破
拘檠吾儕跌宕文字飲縱使麤疎免俗滑生平苦愛謝莊

句千里相思共清越可憐此景不易逢圓缺陰晴變倉卒
人世那能期上壽靈藥誰教駐華髮舉杯矯首問姮娥何
事朝朝守枯暵十年枵腹厭茶堇三載傷心失鸚鵡人去
瑤臺何處尋我欲乘風訴眞闕對酒當歌倍悽愴况此良
宵思結惛獨立蒼茫飲罷時孤影空階散林樾明朝行見
挂纖纖堅守參橫不知歇

題試茶圖

穀雨新晴採露芽清泉活火試甌華十年櫻筍江南夢最
愛茗溪隱士家

姜宸英字西溟號湛園慈谿人康熙丁丑一甲三名進
士授編修有葦間詩集

詩話西溟工舉子業兼善詩古文詞聖祖稔聞之
嘗與朱竹垞嚴澆漁並稱三布衣葉文敏薦修明史

既又佐徐健庵輯一統志及成進士年已七十矣廷對聖祖識其手書拔置第三人後二年典順天鄉試同事修撰李燾被彈劾連柴事未卽白卒獄中詩自玉局入少陵兀寡磅礴能以氣舉其儔

徐健庵編修筵上觀洗象

長安六月三伏始主人門對御河水御河流水聲潺潺玉泉奔赴城西灣是日都人看洗象立馬萬騎車千兩曼延蹴踔羅岸旁吹角鳴鉦沸川上滿堂賓客何從容碁局未了酒不空日中報道象奴出至尊朝罷明光宮魑形詭貌三十六一一騎就深潭浴雲起乍疑龍蛇蜿蜒迴更與人翻覆須臾小吏前推排將軍拔營羣象回就中一象行躑躅齒毛脫落顏摧頽長者謂余豈解事此物經今不知歲聞說先朝萬厯初貢車遠自扶南至中更四帝時太平一朝闖賊殘神京忍死不食三品料俯首淚下聲哀鳴滄桑

變換忽塵夢勉強逐隊留殘生茫茫舊事君莫說勸君且
飲杯中物

哭魏叔子

苦節誰云不可貞翠微山共首山清更無安道能求死只
有韓康解避名遠愧文章當縞紵不教官爵累銘旌臨風
一慟江天豁未覺前賢愧後生

宜亭

不知秋遠近水色漲平蕪曬岸多漁網浮舟半竹廬橋鼓
眠折葦檻倒坐閒鳧落日宜亭上寥寥吾輩俱

汪士鋐字文升號退谷吳縣人康熙丁丑進士改庶吉
士授編修歷官右中允有秋泉居士集

詩話退谷與兩兄武曹太史右衡孝廉並嗜學有聲
於時武曹晚達拜視學滇南之命未上官遽卒右衡

未通籍退谷舉於部試哀然居首人詞林積資序進
亦未竟其所學能詩古文尤工書法雜素流傳名遂
出兩

兄上
陳滄洲太守出瘞鶴銘於江中以搨本見示作歌記

之

焦山山崖瘞鶴銘雷擊墜江江冥冥一旦水底出至寶神
物焜燿含精靈此碑書家最珍惜欲搨恐犯蛟龍腥致令
贖本徧天下刻畫媠母誇媠媠或傳此是右軍跡逸少二
字疑足徵或言宏景或顧況未覩真跡憑圖經滄洲使君
好古士搜奇扶怪心無甯搨來江邊問遺碣太息墨寶存
空亭時當窮冬江水涸巉巖洗刮平沙汀或側或仆靈竒
字磊落散布如天星命工舁石置江岸殘筆剩畫稀留形
重依舊石定方位安排字跡還儀型砑如陰崖立華屋恍

然峭壁開新硯字體寬綽近古隸鋒稜雖利光晶瑩睇視
山中宰相筆齊梁風格我所憑何年埋沒忽露洩水存倏
忽仍邱陵吾吳太守素神異驅使直可到六丁狼貪虎噬
且弗避麾斥水怪如蠺蜒世間寶物久必顯雲日肯被煙
塵暝扶傾固待巨人手此舉便已喧驚霆遠道寄我喜創
見從今摹畫希精能此石此銘不再得毋使日夜椎搗無
留停

蔡珽字若璞號禹功漢軍旗人康熙丁丑進士改庶吉
士授檢討官至吏部尙書直隸總督降奉天府尹有

守素堂詩集

詩話禹功自號無動居士又號松山季子仁庵制軍
子也廉介彊直屢起屢躓侃侃不稍撓詩清剛雋上
如其
爲人

宿廣惠寺

牛羊下孤嶺落日暗遠川
暝色入幽谷山翠冷暮煙涼風
吹戶牖歸鳥棲簷前疎林度清磬
一鐙僧舍懸深山少更漏獨向西
窗眠靜坐見明月敲枕聞寒泉巖
壑鎖闔寂轉覺百慮煎良時不再
得胡爲塵繼牽

病起

朝陽照戶宇庭院無纖埃
值此新病起含情獨徘徊開窗
望遙天澹蕩春風來草色萋已綠
鳥鳴亦啾啾卽事多所感惻然心
中哀佳期渺無方躬耕豈易諧何
當絕物役揮手歸蒿萊養眞東陵
廬全此擁腫材

過漳河

琅璫征鐸戒徒馭夾道濃陰滌塵慮
肩輿南下邯鄲南又

過西陵歌舞處玉顏霸業都成灰石火電光安在哉寥落
荒臺長荒草一樹野棠臺上開我欲吟愁愁日遠漳水東
流流不返水邊古渡夕陽斜風捲黃沙眯人眼

經桃源

停舟聊小憩散步野隄邊獨樹下歸鳥寒江多晚煙坡頭
僧刷藥渡口客呼船知是仙源路風光別一天

午至退谷

古寺深林裏蕭然晝閉關泉聲隨亂石落日照秋山遠嶺
牛羊小高原禾黍閒自然心目爽塵慮一時刪

由退谷至廣泉道中

曲曲緣坡道條然策杖登亂谿惟見石半嶺忽逢僧徑轉
已無路山開又一層祇圍鐘鼓靜何處覓秋鐙

過漢江經峴山

峴峰仍北向漢水自東流今古不相待江山空復愁天遙
歸雁急春曉暮煙稠欲覓羊公石萋萋草滿邱

秋日寄懷高十六章之

蕭蕭竹樹暮窗疏鎮日孤吟歎索居滿地落花人去後一
天寒雨雁來初馮生有缺家何在蘇子無田願久虛薄宦
窮愁成底事一回搔首一躊躇

愛煞鷓鴣笑大鵬浮沈小大果何憑閒中舊事都如水夢
裏前身竟是僧堪自信時惟有懶最長人處是無能一枝
腹滿吾求已斂翼榆枋好避矰

雲岡寺

層樓突兀仰神工翠嶺岩巒出半空繞座人瞻巖際佛背

山鈴語殿前風秋灘雨歇寒聲急遠岸僧歸落照紅獨自
跏趺幽意愜好將詩句付奚童

雞特扣山

哀泉流琤琤風林動蕭瑟幽徑悄無人半峯帶殘日

送張萬石下第歸廉州

黃陵廟裏題詩去賈傅祠前酌酒過莫把相思寄湘水楚
山明月夜猿多

李鳳翥字紫庭建昌人康熙丁丑進士官至工部侍郎

過峽江

銅雀臺荒鄴水邊長教天塹鎖寒煙土人廟祀周公瑾只
說巴邱作鎮年

和雨鷺濤雙峽起侵嵐雉堞半山分城東十七洞天內長

憶南朝蕭子雲

張元臣字志尹號豆村銅仁人康熙丁丑進士改庶吉士授檢討歷官左諭德有豆村詩鈔

晚秋游祖將軍園亭

將軍休沐地延佇思無窮賓從當年盛圖書四壁空寒花泣暮雨危葉戰秋風只有琅玕竹青青廢院中

宋聚業字嘉升號南園長洲人康熙丁丑進士官吏部

郎中有南園雜稟

沈歸愚曰南園以剛直忤年制軍致身亡家破其人足重可知矣詩雖不多亦自矯矯

題南陽旅壁

真人白水生文叔名士青山卧武侯水自奔騰趨漢口山猶層疊枕城頭時來一夕收銅馬事去經年運木牛歎息

興亡千載上荒村野廟總悠悠

吳宗豐字揆俞漢陽人康熙丁丑進士改庶吉士官大

同知縣

詩話揆俞廣庵相國子也自詞曹出宰以慈祥爲政不事鞭笞恆徒步問民間疾苦民忘其爲長吏歸田後貧甚廚無宿糴吟詠不稍輟卒年八十有二

過黃州阻雪

曉對篷窗隙披襟問旅程開帆人語靜驟雨浪花平遠岫凝寒翠低雲傍水行江村逢臘日頓令客心驚

王樸字文重號震來黃平人康熙丁丑進士歷官嘉定知縣有蒲水居詩橐

海丹謠

五月十五東風起我向海邊看海水邊民爲我訴顛連我

爲邊民嗟幹止茅籬咫尺是蒼茫朝宗萬派雄如駛一潮
一汐往來間日侵月削誠無已誰云滄海復桑田但見桑
田沈海底憶自熙朝十九年豁賦除田千萬矣只今坍有
廿餘年廬舍邱墟安可紀按籍施弓不易求田形邱勢難
比擬就中豈無半畝禾勤農拌此供波靡一聞履畝勘眞
荒須臾無計圖遷徙沿海殘區欲握苗刈此木棉成荒鄙
冀得豁除尺寸區以爲風濤之一抵嗟哉鑒及此情形溫
言化導何必爾方今聖主恤民艱歲蠲正賦眞淪髓九牛
安用此一毛太倉一粟終何裨從來有土此有財無土將
焉甯婦子額賦豈能問水濱勸稼何由施耘耔不與海水
爭旦夕難爲窮壤圖倍蕪潮泥暫退且施弓眞荒眞熟胥
可指歸來傍晚宿山間山人爲我話桑梓此間一碑近百

年昔日離海三十里於今試看幾何程可知坵勢從何底
君不見吳淞城外舊城斜半在泥中半在沙此是東南一
故壘昔年煙火盡蘆花

送尹仲鑾之壽亭

帝里晴煙散柳枝春風野外送行遲路從嶺互溪盤處人
到花明荔熟時烽燧盡銷成樂壤海洋瀕近是重籬君家
保障知由舊耕織何嘗爲繭絲